



Il disc terra straniera dut sgrîât al zirave intiersecantsi cu lis peraulis de cjançon mamma. Ce bieles zornade, ce bieles fieste par Anute che in chêt dî e leve fûr di pupil. Al jere plui di une ore che la musiche e sunave dentri la cusine, indulà che la taule, par chêt dî, la vevin metude tal mieç. Wafers e amarets a jemplavin une guantiere sistemade dongje un biel vâs plen di flôrs di stagjon che Lino, il pari di Anute, ju veve cjapâts sù in tai prâts. Par chêt zornade la spese e jere costade un voli dal cjâf. Nol mancjâve nuie: chinots, gasosis, daspò une butilie di vermut, chel licôr cussì dolç che Marieto, il fradi plui piçul di Anute, cul tap de stesse butilie, plui voltis al veve cerçât. Dute ligrie ancje chêt! Ancje Rinute, rivade cui prins invidâts e jere contente: a chêt fieste al jere ancje Toni, che in chêt dî se al ves provât a bussâle, no lu varès parât vie. “Pecjât che vin dome chei discs che sunin di un pieç.” si diseve Rinute fevelant di bessole “Se a vessin ancje altris cjançons, magari chês che si balin tignintsi ben strets, une volte studadis lis lûs... mi larès masse ben...”. Cui sa, se cualchi anime buine e veve sintudis lis sôs bramis? Veiù là tal mieç dal curtîl doi zovins forest che a sgarfavin dentri un russac. Jerin zovins che a vignivin di fûr, che a levin a scuele cul fradi di Anute, che par fâ contente sô sùr ju veve invidâts. Dentri in chel sac, ancje se nol jere tant grant, a tignivin dutis lis lôr novitâts e la frescjece de lôr zoventût.

Dute robe che par fortune Sunte, la mame di Anute, no veve viodût. Se no di sigûr si sarès tramudade di muse, zontant il so solit coment: “cuant che si movin i zovins e so redut i students si prepare simpri la vuere.”

E non varès vût ducj i tuarts. Ancje se no volevin la vuere, chei zovins dentri in il russac a vevin bombis di vendi.

Bombis come i cjavei che ur taponavin la cope, e che Lino a pene viodûts al crodeve ancje lui di sclopâ, cui sa se pe rabie o pe vergogne di viodi chei oms diventâts come feminis.

E cuant che nissun s'al spietave di chel sac che un di lôr al tignive simpri te man, velis lis primis veris palotulis.

Sunavin i Beatles i Rollig Stones e ancje chês femine che e cjantave cuintri la vuere. E no dut al jere finît. Fur des bocjjs di chei fantats plens di morbìn jessevin peraulis che disi di vuere al è pôc.. Peraulis lis lôr che se ancje par tancj in paîs e jerin un scandul a Lino no i displasevin. A jerin lis stessis che al sintive in montagne di partigjan.

Dal dut avilide, invezit, e jere Sunte. Puarete, al puest di chês bielis cjançons su la mame che a sunavin a pene tacade la fieste e scugnive scoltâ dome chel folc che ti trai che e faseve sunâ chês zovintûts.

“Ise musiche chês ch’a balin chei mats? - si domandave chês femine dute avilide -.Saltin come spirtâts, o s’ingropin un cun chês altre come madracs. Vergogne,viôt li ancje Anute si fâs braçolâ come chês che si viodin tal cine.”

La plui contente, invezit, par chês biele zornade e jere Rinute. Chei fantats che vignivin di fûr, par tant ben che balant la vevin strenzude, ju veve bussâts ducj dôî.

E Toni puaret? Vere, lui non saveve balâ, ma finide la fieste, se la ves compagnade sot li stelis, une bussade e ancje dôs e sares stade ancje par lui. E chês e jere propit d’amôr.

**di Nello Malisano**